



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

MOELETSI OA BASOTHO

PARARE DOMINO PLEBEM PERFECTAM



Toro e chabeloa ke letsatsi

2

'Muso ha o'a ithopha

5



METSOFE HA E TŠOASE

www.moeletsioabasotho.co.ls



Re se re fumaneha ho marangrang

Email: newsroom@moeletsioabasotho.co.ls
Tel: +266 28350466/ Whats app: 62600983

MOELETSI**Ho thabile ba
itseng**

Letsatsing la la 19 Hlakola monongoaha sechaba sa Basotho se ne se lebeletse ka tšepo e kholo Se-ea-le-moea-pono, ho boha Letona la Lichelete le Ntšetsopele ea Meralo ha le teka paramenteng khakanyo ea lichelete ea selemo sa 2025/26. Khakanyo ena e fupere lintho tse ngata tsa bohlokoa, empa e kaholimo eo e seng hangata re e utloang ke ea moruo o phahameng ka linoko tse peli lekholong. Kholo ena e baki-loe ke khaho ea Letamo la Polihali 'moho le mesebetsi e moholo ea ntlafatso e kenyeletsang khaho ea litsela. Hara makala a abetsoeng chelete la Khiri le Bosebetsi le thabetse khakanyo ena hobane e fupere e meng ea meralo ea lona. Letona le ikarabellang le bontšitse le thabile hore ebe ba fuoe monyetla oa ho aha likamano tse ntle le linaha tse ling ka sepheo sa ho batlela Basotho mesebetsi kantle ho naha; ekaba ba na le litsebo kapa ba li hloka.

Ka lehlakoreng le leng ho na le lingongoreho tse ngata haholo, tse kenyeletsang Lekala la Bophelo moo ho sa thoeng letho ka basebetsi ba feletsoeng ke mosebetsi kamor'a hore Naha ea Amerika e hule lithuso tsa eona likhoeli tse tharo kaofela. Potso ke hore na 'muso ha o shebahala o sa natse taba eo, o re Basotho bao ba bangata hakaalo ba entse joang? Ho feta moo qholotso e 'ngoe e kholo ke palo e phahameng ea bacha ba hloka mesebetsi bao hara bona ho thoeneng ba 226, 856 ba se ba nyahame hore ba ka boela ba fumana mesebetsi. Bahlanka ba 'Musos ekelelitsoe ka 2%, batho ba nang le bokooa ba fuoe M50.00 empa selemong sena metsofe ha e-ea fuoa letho ho thoe e itlame mala-masesane. Motho o sa ntsa tsofetse, bophelo ba hae bo se bo e-na le lithoko tse ngata joaloka ba ngoana, ekaba h'a itlame mala-masesane ke ha a etsa joang?

Lilemong tse re phelang ho tsona, motho a ka lumela hore litloaello tse ling tse neng li sebelisoa ke bo-ntat'a rona moholo li felile. Har'a litloaello tseo ke tsa banna ba neng ba hanela basali ho sebetsa kapa ho etsa lintho tse ling tse molemong oa bona 'moho le malapa a bona. Lekala la Tekano, Bacha le Ntšetsopele ea Sechaba, ka basebetsi ba lona Seterekeng sa Quthing le kopane le qholotso ea basali ba seboko ka banna ba ba phelisang ka tlhekefetso. Ka nako eo seo basali bana ba se etsang se molemong oa bona banna bao ba ikemeng, ba ikentse lipoho tsa kothu. Taba ea hore naha e aparetsoe ke bofuma, ke ntho e bonoang le ke tsipa-seholo joale banna bao ba ikoetse mahlo? Ke batho ba hloka lerato ho basali, bana 'moho le malapa a bona. Ke banna ba lehlohonolo hobane ba fumane balekane ba utloisisang hore lenyalong hoa thusanoa, etsoe moketa ho tsosoa o itekang.

Leha ho le joalo, ho na le mosali oa Mosotho ea thehiloeng Mokhatlo o bitsoang EMPOWERHER oo a reng o o thehile kamor'a ho hlokomela boima ba mesebetsi oa hae hobane o ne a se a ntse a thusa basali a le mong. Joale ha fihla tlhokomelong ea hae hore kopano ke matla, h'a ka ikopanya le basali ba bang ba ka etsa mesebetsi o moholo. Enoa motho o hlile o tsoere thipa ka bohaling, kopano ena ea basali e t'lo ba letlotlo le lehlo le tla thusa basali mekhahlelong eohle ea bophelo. Hona mona ha ba ntse ba fanana malebela mabapi le ho itsoarela ka matsoho ho beha bohobe tafoleng, ba ka qetella ba hlabollana. Ka nako e 'ngoe ho hlaboloha ha se ho bua le setsebi feela, empa ho bolela mathata a hau feela leha motho eo u mo qoqelang a ke ke a u thusa hakaalo, ho bua hoo ke setlhare se fetang lithare.

MOLIMO A BOLOKE LESOTHO LE BASOTHO**Toro ea hae
e chabeloa ke letsatsi****Nthabeleng Seithleko**

Letona la Khiri le Bosebetsi, Mohlomphehi Tšelis Mokhosi o tlohile mapatlelong a paramente sefahleho se tletsoe ke pososelo, kamor'a hore ho hlalelle likhakanyong tsa lichelete tsa 2025/26 hore 'muso o tla kena leetong la ho batlela Basotho mesebetsi linaheng tse ling, ka la 19 Hlakola monongoaha.

Puisanong le Koranta o itse moralo oa lekala la habo oa ho tsomela Basotho ba nang le litsebo le ba se nang tsona mesebetsi ka ntle ho naha o chabetsoe ke letsatsi. O re sena ba ile ba rera e le lekala ho se etsa e le karolo ea ho hlahisetsa Basotho mesebetsi, le karolo ea ho nyolla moruo oa naha kaha lichelete tseo Basotho ba tla li fumana linaheng tseo ba sebetsang ho tsona karolo e 'ngoe e tla ba e oelang matseteng a naha.

O bontšitse ha hlathe e lelekisa tsebe hobane ha se hangata khakanyo ea lichelete e reng qii! Holima lithoko tsa bona. A re ba tla batlela Basotho mesebetsi ea nako e telele kapa e khutšoanyane, 'me karolong ea chelete eo ba e abetsoeng, ba tla nka maeto ho ea etsa boithuto linaheng tse ling ho etsa karolo ea tumellano.

"Ke batla ho sia ke ngotse nalane tšebetsong ea ka ea topollo ea Basotho tlang ea boja-likata." Ke Mokhosi



eo.

O itse o sebetsa ka thata ho sututsa hore taba ena e phethahale molemong oa ntlafalo ea ngoan'a mosotho. O ipilelitse ho Basotho hore ha ba hloka mesebetsi eo ba tle ba ee libakeng tse lokelang joaloka lekaleng la habo ha ho entsoe phatlalatsa ho qobisa batho litaba tsa batho ba hoebang ka batho ba bang kapa thekisetano ea batho.

Lekala lena le abetsoe M81.6 Million ho phethahatsa merero eohle ea lona, ho kenyeletsa le ea ho tsomela Basotho mesebetsi linaheng tse ling.

Letona la tsa Machabeng Mohlomphehi Lejone Mpotjoane, o thoholelitse 'muso oa habo ka hore khakanyo ena ea lichelete e matla, e t'lo thusa hore bacha ba qetelle ba fumane mesebetsi ea litsebo tsa bona kantle ho naha. A re naha e se e

kene lipuisanong le linaha tsa Seychelles Mauritius, Canada le Germany, ho aha likamano le ho batlela Basotho bophelo.

A re mesebetsi ona o moholo o t'lo lopolla Basotho kahar'a tla ea ba tjamelaneng le eona ea tlhokahalo ea mesebetsi haholo ha boholo re le sechaba se rutehileng. A re lekala la habo lona le ts'oere ka thata litabeng tsa ho bopa likamano tsa machaba, le ho bona hore Basotho ba ba le boemeli kahar'a mekhatlo ea machaba e le hore ba qetelle ba fumana monyetla e fumanoang ke linaha tse ling.

O re ba lokela ho bona hore Naha ea Lesotho e ba le ofisiri kahar'a SADC joalokaha e le setho kahar'a mokhatlo o joalo.

Ho sa le joalo tlaleho ea khakanyo ea lichelete ea selemo sa 2025/26, sehloohong se buang ka tlhokahalo ea mesebetsi, e bontšitse hore ho bacha ba 760,230 ba lilemo li 15 ho isa ho tse 35 ba 145,087 ha ba sebetse ho bolela hore 39% ea bacha ba ntseng ba batla mesebetsi ha ba e fumane.

Ha 38.9% ea bacha ba hloka mesebetsi 'me basali ba banyenyane ba eleng 40.8% ba suptjoa ba le tlakotsing ho feta bahlankana ba banyenyane ka 37.1%. Lesotho ke bonnyane 226,856 ea bacha ba hlalosoang ba se ba nyahametse ho batla mesebetsi.

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO

A LOKHETSE MORENA SECHABA SE PHETHEHLENG (LUKE 1:7)

Editorial

Lesoetsa Rakubutu

(+266) 6203 1949 / 58190670

EMAIL: editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

57 665 038/ 68 216 271

Tšelis Thakholi

58 540 853/ 63 480 404

Production Desk: 'Mateele Liqa

Metsofe ha e tšoase



Nthabeleng Seitheko

Moruo oa Lesotho o hlalosa ke Letona la Lichelete le Ntšetsopele ea Meralo Dr. Retšelisitsoe Matlanyane, o hotse ka 2% ka lebaka la khaho ea Letamo la Polihali le mesebetsi e meholo ea ntlafatso e kenyeletsang litsele. Litaba tsena li hlahetse, nakong eo a neng a fana ka khakanyo ea lichelete ea selemo sa 2025/26, ka la 19 Hlakola monongoa-ha, paramenteng.

O tsoetsepele hore ho bonahetse ho theoha haholo ha tlhahiso le lekeno la tlhahiso ea lifeme ka 8% le temo ka 5%.

Bahlanka ba tsoepeletsoe 2% ha ba ne ba kopile 25%, ha maqheku le maqhekoana a sa fumana letho kaha a re ba lokela ho itlama mala-masesane, empa selemong se fetileng o ne a ile a ba nyolella ka M50.00. Ba nang le bokooa ba abetsoe M50.00.

'Muso oa Lesotho o na le mokitlane oa M22 Billione,

'me o atlehile ho lefa M1.3 Billione, joale o bonahala o ntse o imetsoe ke palo e holimo ea khiro ea bahlanka ke ka hoo ba sa atleheng ho hira batho ba tsoang kante ho naha. Lekhetho la koae le tla nyoloha ka 5% la joala ka 2.5%.

Khakanyo ena ea lichelete e bopiloeng holima sehlooho sa "maano a kenyeletsang bohle a kholo" e tsepamisitse maikutlo ho theheng moruo o eteletsoeng pele ke bo-rakhoebo, ho khothaletsa kholo, ho theha mesebetsi, ho ntšetsapele meralo ea motheo le ho tsoelapele ho etsa liphetoho tse hlokehang tsa maano. Sepheo ke ho etsa hore Naha ea Lesotho e be e atlehileng, e hlokanng leeme ho baahi bohle ba eona.

Khakanyo ena e shebane le ho laola lichelete tsa sechaba hantle, ho khothaletsa kholo ea moruo le ho sireletsa lihlopha tsa sechaba tse tlokotsing. Ho aba chelete e ngata bakeng sa matsete, haholo ho meralo ea motheo le ntšetsopele ea moruo.

O itse ba tla shebana le

ho rarolla bothata ba tlhokahalo ea mesebetsi ho bacha, ka ho ba le mananeo



a ho tšehetsa bo-rakhoebo ba bacha.

A re 'muso o tšepa ho hohela matsete a lehae le a kante ho naha, ka sepheo sa ho ba le moruo o matla, o tsitsiseng haholoanyane le o kenyeletsang bohle.

Moetapele oa Bohanyetisi Paramenteng Mathibeli Mokhothu, o re likhakanyo tsa lichelete li lokela ho arabela litlhoko tsa mantlha tsa Basotho e seng ho lihella likhoebotse ling tora joalokaha ho pitliloe bahoebi ba lekhetho la koae le joala ka likhafa tse boima, kaha ba bang e le bahoebi ba banyenyane. O itse nyolלה ea bahlanka ea 2% e ntse e fokola kaha litheko mabenkeleng li ntse li phahame tsa lijo le thepa ka 4.5%. Ha mekitlane ea naha e ntse e le holimo le eona.

O re 'muso o tšoanela ho sheba ka hloko mekitlane ea naha kaha e le ho 57% ha sekepele sa liphelelo e le 60% , 'me ho bohlokoa hore ba tšoare ka thata ho bona hore chelete ea lekeno ha e

na ho sebeletsa ho lefa mekitlane empa e tla etsa lintlafatso. A re sejo senyane ha se fete molomo, mosebetsi oa bona e se e le ho beha 'muso leihlo hore na o tla sebetsa joang nakong ea likhoeli tse 12 kamor'a khakanyo ena.

Moetapele oa Mokha oa Basotho (BNP) Machesetsa Mofomobe, o hlalositse hore seo a neng a se lebeletse ke hore 'muso o thuse bacha ho ba le menyetla ea lichelete hore ba iqalle likhoebotse haholo ka lehla-koreng la temo, e le karolo ea tlhahiso ea mesebetsi. Ka hoo o itse khakanyo ena ea lichelete ha e arabele litlhoko tsa sechaba ka botebo 'me sena se re batho ba ntseeng ba ithuhisa ka bobolu ba ho ikabela mesebetsi ba tla tsoelapele.

ntse e itšetlehile ka pokello ea lekhetho, litsiane tse fumanoang litabeng tsa metsi, likalimo, lithuso le SACU.

A re chelete e fumanoang ke 'Muso oa Lesotho ea SACU e leng M11 Billione, e bang ba Afrika Boroa ba ka khetha ho e hula naha e tl'otobana le mathata a mangata, ka hoo ho bohlokoa hore ba pusong ba be le boitlhopho sebakeng sa lekeno le leng ntle le ho itšetleha ho machaba.

O itse ho bohlokoa hore ho etsoe theolelo ea matla sechabeng, Basotho e be bona ba nkang boikarabelo ba tokiso ea lithepa tsa sechaba metseng joalokaha lipompo hore litsebo tsa sechaba li sebelisoa e le karolo ea tlhahiso ea mesebetsi. Hape a re likolo tsa thuto ea matsoho li matlafatsoe, hore bana ba Basotho ba tsebe ho iketsetsa mesebetsi.

"Hangata naha e nang le barutehi ba bangata, e qetella e na le batho ba ka senyetsang mebuso ka mahlale a bona." A rialo.

A re sena se ka hloloa ka hore 'muso o batlele bacha mesebetsi linaheng tse ling, ba e-na le litsebo kapa ba li hloka.

Ho sa le joalo, makala a abetsoe chelete ka tsela e latelang, Lekala la Bophelo le abetsoe M1.3 Billione, la Khoebotse M423.8 Millione, la Lipalangoang le Mesebetsi e Mehola M3.2 Billione, la Thuto le Koetliso M3.1 Billione, la Temo, Kanetso ea Lijo le Phepo e Nepahetseng M1.3 Billione, la Khiro le Bosebetsi le abetsoe M81.6 Millione, la Matla M1.5 Billione, la Metsi M 2.2 Billione, la Bohahlauli M27.2 Millione ha la Tekano, Bacha le Ntšetsopele ea Sechaba le abetsoe M1.5 Billione.



RE TŠEHETSA BACHA

Tšeliso Thakholi

Leqeme la mesebetsi kahar'a Naha ea Lesotho ke bothata papisong le lilemong tsa ho feta, ho bonahala boholo ba bacha ba Lesotho ba ntse ba fetoha mahlatsipa a ho se sebetse letsatsi ka leng kamor'a hore ba phelethele lithuto tsa bona ka katleho litsing tsa likolo tse kholo tsa thuto. Hantle bacha ba angoang ke tlhokahalo ea mesebetsi kamehla ha se feela ba nang le mangolo a thuto, empa le ba se nang ona ba ameha ka mokhoa o tšoanang.

Leqeme lena le utluoa kaofela ke mahlakore ana a mabeli. Ke 'nete 'muso oa leka ka ntho e bitsoang Sebatso empa tema e ntse e-s'o bonahale hantle. Se seng sa morero oa Sebatso ke hore ka lits'ebetso le litalenta tseo bacha ba nang le tsona, ba iqa-

pele mesebetsi e mecha e sa tloaelehang kahar'a naha. Mofumahali 'Mathekiso Ramositli ke mothehi oa khoebo e ncha haholo e sa tloaelehang kahar'a naha e etsang liteko tsa mefuta eohle ea lihlahisoa tse kang tsa lijo, lino le mobu bakeng sa lihoai.

Hana uena o se-beletsa ho kae? leb-itso la khoebo ea hau ke mang?

Khoebo ea ka ke e ikhethang kahar'a naha, 'me e sa ntse e le eona ea pele ea mofuta oa eona, 'me e bitsoa Bioscience LAB (Laboratories) e fumanehang moahong o ka tlasa Sekolong se Phahameng sa Bereng tseleng e lebang motseng oa Matholeng Seterekeng sa Mafeteng. Mofuta ona oa khoebo ha se o fumanehang habobebe literekeng tse leshome tsa naha.

Re etsa liteko tsa lihlahisoa tsa Basotho ka mefuta eohle ea tsona ho bona hore na li mae-mong a matle, molemong



oa bophelo bo botle ba sechaba. Re etsa liteko tsa lintho tse kang lijo, lino le mobu ho thusa lihoai bakeng sa tlhahiso e ntle ea lijalo. Re boetse re fana ka litšebeliso tse khethehileng tsa 'Laboratories' ho likolo tsohle tse hlohang litšebeliso tsa mofuta o joalo. Re thusa likolo tsohle tse kahare ho naha tse hlohang litšebeliso tsa rona.

Na ho na le litlholisano tseo khoebo ea heno e kileng ea

li kenela molemong oa boichoriso le ho imatlafatsa?

Ka selemo sa 2022 re ile ra kenela litlholisano tse tšehelitsoeng ke BEDCO tsa Bacha Enterprise ra ikhapela tlhoko. Re ile ra atleha ho fumana mohope le chelete e ileng ea re thusa haholo ho matlafatsa khoebo ea rona ka ho eketsa lintho tse ling tseo re neng re li hloka. Ra boela ra kenela litlholisano tsa Sebatso le teng re hapile bokhothokhotho ba chelete e tllilo re thusa haholo ho eketsa thepa ka eona, e le hore re tsebe ho se-beletsa likolo le sechaba ka tsela e makhetho ho feta mona.

E 'ngoe eo re ileng ra e kenela ke e bitsoang Lesotho Entrepreneurship Project moo re ileng ra boela ra ipabola ka ho hlaha boemong ba bobeli. Che, mona teng ha rea hapa chelete. Mabaka a etsang hore tšebetso ea rona ebe e tsoileng matsoho ke ho sebetse ka thata le ho ba le lerato la mosebetsi oo re o etsang. Rona re etsa mosebetsi oa rona ka lerato le ka boitelo. Basotho bohle ba tllileng litšebeliso tsa rona re ba amohela ka mofuthu le ka lipelo tse tšoeu.

Le se le sebelitse lihoai le likolo tse kae, ho tloha le galiile khoebo?

Haele hantle re se sebelitse lihoai tse ngata haholo ho tloha re thehile khoebo ena, 'me li khotsofetse haholo hoba boholo ba bao re seng re ba thusitse ba se ba tseba maemo a mofuta oa mobu oa bona. Sena se ba thusa hore ba tsebe

ho ba le tlhahiso e ntle haholo ea lijalo. Taba e ba thabisang ke hore litšebeliso tsa rona ke tsa theko e tlaase haholo.

Na ke mosebetsi o ka o khotlaetsang bacha ba ntseng ba lutse feela mahae hore ba ka o etsa?

Bacha ba ka kena khoebo ena ha feela ba e-na le mamello, sepheo le lerato la eona. Hantle mofuta ona oa khoebo o hloka bacha ba nang le lerato la eona. Ha mocha a se na lerato la teng ke ipotsa hore na o tla tseba ho ea joang masimong ho ea kha mobu ho tla etsa liteko metseng koana, letšeaare kaofela? Ke ka lebaka lena ke reng mocha h'a hloka lerato la temo a ke ke a mamella. Ka mokhoa o tšoanang lerato ha le le sieo na ba ka tseba ho thusa bana ba likolo ha ba tllile ho ba fa letsoho kahare? 'Na haesale ke e-na le lerato la mosebetsi ona, 'me taba ena e maling ho 'na ke ka lebaka lena ke atlehang ho o etsa ha bobebe.

Hantle o hloka motho ea joang?

Ke se ke boletse ntabe hore o hloka motho ea nang le lerato la ona, thahasello le boitelo. Ke phetho ke tu!

Toro ea hao ke efe?

Ke rata ho bona khoebo ena ea ka e hotse e se e etsa liteko tsa lintho tse kenang le tse tsoang kahare ho naha li etsoa mafatšeng a mang le hore tseo re seng re li etselitse liteko kahare ho naha li ee mafatšeng a mang li se ke tsa fella feela kahare ho Naha ea Lesotho.



Listen To Us Here

Mafeteng
Mohale's Hoek
Qach's Nek
Quthing



Maseru
Berea
Leribe



Mokhotlong
Thaba Tseka
Butha Buthe



www.bokamoso974.co.za

'Muso ha o'a itlhophela tlokotsi-Sehlabaka

Nthabeleng Seithheko

Molula-Setulo oa Komiti ea Boiketlo ba Sechaba Mokhothu Makhalanyane, o re komiti ea habo e t'l'o sebetsa ka thata ho bona hore nakong eo ba abelang Lekala la Bophelo chelete, ho tla kenyeletsoa boitlamo ba lekala le mekhoha e t'l'o thusa ho inola Basotho tsietsing e bakiloeng ke ho huloa ha lithuso tsa Naha ea Amerika nakong ea matsatsi a 90. Litaba tsena o li boletse puisanong le Koranta ka la 19 Hlakola monongoaha, paramenteng.

O re tebello ea hae e ne e le hore Letona la Lichelete le Ntšetsopele ea Meralo, Dr. Retšelisitsoe Matlanyane, o tla e ama khakanyong ea lichelete ea 2025/26 empa ha ba tsebe lebaka le entseng hore ebe ha ba re letho ka litaba tseo.

O supile ha litaba tsena e le tsa tlokotsi 'me naha e lokela ho phatlalatsa moo e teng, le ho itokisetsa nako e tlang e bang mathata a ka ba teng. A re ha joale ketsahalo eo e se e amme



Basotho ba 1,500 ho isa ho 3,500 ba lahlehetsong ke mesebetsi, ka hoo bohle ba lokela ho hlakeloa hore na ho t'l'o etsahala joang ka polokeho ea bophelo ba sechaba.

Ho feta mona, Moetapele oa Mokha oa Mpulule Political Summit Edwin Sehlabaka, o supile hore 'Muso oa Lesotho o ne o lokela hore e be o iphatlalalitse ka botlalo hore na o t'l'o imolla sechaba joang. O re tebello ea hae likhakanyong tsena tsa lichelete ke hore ebe 'muso o phatlalalitse mekhoha eo ba t'l'o e sebelisa hore Ba-

sotho ba 'ne ba fumane litšebeliso tsa bophelo tsa boleng.

Ho ea ka eena chelete e abetsoeng Lekala la Bophelo e nyane ho latela maemo a tlokotsi a ho huloa ha lithuso tsa Naha ea Amerika. A re nakong ena feela batho ba bang ba se ntle ba hloka litšebeliso tsa bophelo metseng, kaha ho se bahlabolli leha litšebeliso tse ling li ntle li etsahala.

H'a phethela o supile hore litaba tsa bophelo bo botle ba sechaba li lokela ho phamoleloa holimo kaha e le sechaba se sengata se

phelang ka lithhare tsa bophelo bohle. O itse ha se patuo e hore Lekala la Bophelo

le ile la fana ka tšepo empa 'muso o ne o lokela ho iphatlalatsa ka boitlhopho ba bona.

Lekala la Bophelo le abetsoe M3.1 Billione, selemong sa lichelete sa 2025/26, eo morero o moholo oa eona e leng ho ntlafatsa bophelo ba sechaba le phano ea litšebeliso le ho theola sekhalo sa mafu a kang phallo ea mali, tsoekere le ntlafalo ea meaho ea Litsi tsa Bophelo.

Ho ntlafatsa basebetsi ba tsa bophelo metseng ka likoetliso, ho bona hore litšebeliso tse fanoang sechabeng e ba tse bolokehileng, le ntlafalo ea lisebelisoa sebakeng sa tlhahlobo ea lefuba ka marang-rang.



EmpowerHer e hlahella sechabeng



Nthabeleng Seithheko

Mokhatlo oa EmpowerHer o phatlalalitsoe ka molao e le o reretsoeng ho tla ntlafatsa ngoan'a ngoanana le mosali hore ba iketsetse ka ho ba fa likoetliso tsa mesebetsi ea matsoho e le karolo ea boipheliso. Litaba tsena, li hlalositsoe ke mothehi oa mokhatlo ona, W/P/C 'Matlhokomelo Machaha, ka la 15 Hlakola monongoaha.

O re sena mokhatlo o se etsa e le karolo ea ho ara-

bela litaba tsa tlhokahalo ea mesebetsi ho basali ba hlohang litsebo le ba nang le tsona hore bohle ba be le seo ba ka iphelisang ka sona. O itse morero o moholo ke ho koetlisa basali le banana ka mekhoha e fapakaneng ea boipheliso, eo qetellong ba ke keng ba ba nyahlatsa har'a tsela empa ba tla ba thusa ho fumana mebaraka kaha e le qholotso e kholo.

A re har'a likoetliso tseo ba tla fana ka tsona ke ho etsa litlolo, moroko le tataiso litabeng tsa khoebo. O re ke tšepo ea hae hore morero ona o ke ke oa fel-la har'a tsela empa e tla ba seikokotlelo le bokamoso ba basali ba Basotho.

H'a phethela o re o se a ntle a thusa basali ka mekhahlelo e fapakaneng, empa o ile a hlokomela hore h'a khone ha a le mong o ile a khetha ho theha mokhatlo ona, o tla thusa hore basali ba tšoarane ka matsoho ho matlafatsa basali ba bang, le ho tliša tšepo bophelong ba bona.

Mohlahlami oa Mookamelu oa Sepolesa sa Leso-

tho Dr. Mahlape Morai, o bontšitse bohlokoa ba hore basali ba phahame le kahar'a liqholotso tsohle tseo ba tobaneng le tsona, ba se ke ba inehella mathata ho qeta ka bophelo ba bona hobane ha ho motho ea sa kopaneng le mathata.

O re basali ba lokela ho ema ha Molimo a sa re ho lekane, ba ahe tsohle tseo ba neng ba nahana li shoele kaha li atleha ho khutla. O itse pele ho tlhoho le katleho ea bophelo ba basali ba bangata lefatšeng ho na le pale le bopaki bo tsoang ho Molimo bo lokelang ho qala

hona joale leetong la bophelo ba mosali e mong le e mong.

A phethela ka hore basali ba tseba ho betla tsela, ke bo-pula-maliboho ka lebaka leo ba lokela ho loanela ho phahama ho fihlela lefatše le tšoare bopaki ba hore mosali a ka lokisa lintho tse sa lokeleng.

Dr. Khothatso Tšooana o itse ho bohlokoa ho ba le lipuisano le batho ba bang, kaha motho e le motho ka batho, 'me khokahano e tseba ho bulela motho tse-la e mo ntše lefifing le letšo e mo lebise khanyeng e tlišang khotso e sa feleng.

O re ka linako tsohle haholo bacha ba tloaele ho ba le likamano tse ntle le batho kaha tse ling e le tse bulang menyako motho a ka qetella a atlehisitsoe ke likamano tse ntle le batho, le ho itumella ho ikisa bathong ka sebete ho se tšabo ea letho. A re batho ba lokela ho ba le mamello hobane seo se etsa motho ea etsang lintho ka sebete, 'me basali ba tsebe hore ba matla ba tseba ho fetola lintho tse sa fetoheng.

Ho feta mona, Siphon Mqanda o re basali ba fuoe matla le bohlale ba ho jarrella lintho tsohle ke ka hoo boholo ba ntseng ba eme leha maemo a sa lokele. A thatiselletsa ka ho re basali ba lokela ho ithata kaha ba fuoe bohlale, tlhompho ke leholimo, ba khaotse litaba tse ba hlophisang seriti.

Ka lehlakoreng le leng, Mohlabolli Tšepang Majara, o itse basali ba lokela ho lula ba hloekisitse mehala ea bona, kaha ho na le batho ba sa hlokalaleng bophelong ba bona, ba bang ke ba emang tsoelopele ea bona kapele.

A re bacha ke leruo la naha, ebile ke bokamoso ba naha kajeno le nako e tlang, ka hoo ba lokela e be ba ikemetseng, ba etsang botle le ba loanelang tsohle tsa bona. Ba lokela hoba le matla a tšebeliso le ho bitsa lentsoe lena chee!

O supile hore sohle seo motho a batlang ho se fihlela o lokela ho tseba ka sona, a bale ka sona, a bue le batho ba nang le litsebo tse joalo hore a tsebe ho fihlela seo a se hlohang.



Basali ba rutoa ho boloka lijo

Nthabeleng Seithheko

Mosebetsi oa Lekala la Tekano, Bacha le Ntšetsopele ea Sechaba, Tosing Community Council, 'Mathapeli Kitleli, o re ba tobane le phephetso e holimo ea basali ba sitoang ho etsa mesebetsi ea boipheliso ka bolokolohi ka lebaka la balekane ba ba phelisang ka tlhekefetso. O boletse tseba, puisanong le Koranta ka la 17 Hlakola monongoaha.

O hlalositse hore lekala la habo le sebetsa ka thata ho bona hore basali b'a ntlafala ba tseba ho iketsetsa haholo ho ithahisetsa lijo le mokhoa oa ho li pheha, ho qoba har'a tse ling bokakachelana boo e leng qholotso. O re sena ba se fihlela ka hore ba kopanye basali hammoho ho ba



thakela ka malebela le ho ba khothaletsa ho hlahisa lijo malapeng.

A re thahasello e teng empa boholo ba nyahlatsa leeto lena har'a nako ka lebaka la balekane ba bona. O re qholotso e 'ngoe e ileng ea etsa hore ba khothale tse hore ho be le merero ea boipheliso ho basali, ke hobane boholo ba etsa bana

ka bongata, ba sitoa ho ba fepa ka nepo ka lebaka la khaello ea lijo.

O re hape ba sebelisa chelete eo ba e fuoang ke lekala hore ba tlatsetse litabeng tsa boipheliso hampe e bile e le nyenyane. O re morero ona o thusa basali bao ho iketsetsa ka ho hlahisa lijo malapeng le mokhoa oa ho li boloka

ho baleha tlala.

O tsoetsepele hore ba kopana 'moho le bo-mmaphopo ho hlaha Lekaleng la Temo, Kanetso ea Lijo le Phepo e Nepahetseng ho bona hore basali bao ba tseba ho phehela bana lijo tse lokelang. O itse ba ileng ba tsoarella lithupelong tsa bona ba se ba tseba ho boloka lijo ka libotlolong e le tsa nako e telele le ho bona hore batho bohle ba ithophela bophelo bo tlang.

O phethetse ka hore lekala le etsa sena ho fokotsa palo ea batho ba thusoang ka litsiane hore ho tsebe ho thusoa ba bang ba bacha kaha batho ba hloka lithuso ba le bangata.

Ho sa le joalo, Mookameli oa Agric Economist Yolandi Marais, o bontšitse hore boiponahatso ba basali litabeng tsa ho ithuta ka poloko le polokeho ea lijo sebakeng sa nako e telele kahar'a Naha ea Lesotho ke bo khotsofatsang, kaha ba e-na le lihlopha tse ba

thusang ka litaba tsa phepo e ntlafetseng, le mekhoha ea ho lema malapeng.

O re basali ha ba tseba ho boloka lijo hoo ke sethala se settle sa ho hlola tlala le tlhokahalo ea lijo ka lapeng. Ha tseo li le teng, o re bophelo bo botle bo bonahala le baneng. A re melemo ea hore basali ba kene temong ea lehae ka matla ke hobane ha e sebelise lichefu ho ntlafala 'me ba atleha ho ja lijo tse matlafetseng, tse ba thusang ho phela hantle 'meleng, ba tsebe ho tseba ho tsepamisa maikutlo le ho ba le boinahano bo botle ka bokamoso ba bona.



O phethetse ka ho ipiletsa ho basali hore ba tsoelepele ho theha mekhatlo e ba thusang hore ba ikopanye ba thakeloe ka malebela sebakeng sa boipheliso, e le karolo ea ho ithabela mesebetsi le ho phelisa malapa a bona.

Le hloekisa sesiu sa bahloki

Nthabeleng Seithheko

Ele ho theola sekahla sa tlhokahalo ea mesebetsi, bofuma le ho imolla sesiu sa pokello ea lipalo-palo tsa bahloki, Lekala la Ntšetsopele ea Sechaba le tsoaretse bakoetlisi ba 50 thupelo, holima merero ea boiketsetso. Litaba tse na, li bile ka la 17 Hlakola monongoaha.

Setsebi litabeng tsa boiphihlelo ba sechaba metseng, ho hlaha Lekaleng la Ntšetsopele ea Sechaba Tlelima Phakisi, o bontšitse hore batho ba tl'ona una molemo kahar'a morero ona, ke ba lilemo li 18 ho isa ho 60, ba ileng ba etsa likopo tsa mefuta ea likhoebo tseo ba ratang ho iqalla tsona, 'me har'a likhoebo tseo ke ba etsang temo le likhoebo tse nyenyane tse fapakaneng.

O re lekala le ile la ikeletsa hore nakong ea tlhokiso ea sesiu sa bahloki le bahloki-hloki sa lithuso tse fanoang ho sechaba, ba seng ba ntšoa kahar'a sesiu seo ba

se ke ba lahloa khrehloa, ba fuoe malebela a boipheliso a moshoelella. O re ba hloekisitse sesiu hobane se ne se bonahala se tletse, le hore batho ba bang ba se ba lokela ho ntšoa ho latela lilemo tsa bona.

O re tebello ke hore motho ka mong o tla thusoa ka M5, 000.00 ho iqalla khoebo, bakoetlisi ba tla alosa tšebetso le ho tataisa bao hore likhoebo tsa bona li bonahale li atleha. O itse ke batho ba 10,000 ba tla una molemo 'me bona ba arotsoe ka mekhahlelo e 'meli moo ho tla qaloe ka ba 5,000, moo ho tla thusoa ba 2500 ebe ha morao ho thusoa ba bang. A re chelete e tl'ona sebetsa morerong ona, ke e alimiloeng Bankeng e Kholo ea Lefatše e leng \$11 Million.

O re morero o tla qala ho sebetsa Kanseleng ea Tosing, Thaba-Mokhele, Metsi Maholo, Bolahla le Phuthiatsana, hang hoba o atlehe o tla anela le libaka tse ling. Mosebetsi ona oa lilemo tse hlano o tl'ona kenngoa tšebetsong ke Catho-

lic Relief Services (CRS). A re batho ba koetlisoang ba lebeletsoe hore ba il'ona tataisa batho ba ikhethetseng ho kena temong ka litsebo hore temo ea bona e tle ebe e atlehileng.

Ho etsa tšalo morao le ho netefatsa hore chelete ena e tla sebetsa morerong ona, o re batho bohle ba tla una melemo ba tla tekana foromo ea boitlamo ba bona, 'me ho hloahilo libaka tseo ho bonahalang bohloki bo atile.

Mokoetlisi thupelong ena



Danie Van Den Berg, o hlalositse hore batho ba il'ona koetlisa batho metseng ba tsoanela ho ithuta hantle ka tikoloho eo ba il'ona sebetsa ho eona, ho tseba liqholotso le ho etsa meralo ka tsela e hlakileng.

O re ba lumela hore ho na le bokamoso kahar'a naha ena litabeng tsa temo kaha batho ba ratang temo ba bonahala ba le bangata ho feta ba likhoebo tse ling. A re seo ba se hloka ke hore kamor'a koetliso ena batho bohle ba bonahale ba utloisisa 'me ba tseba ho tataisa sechaba ka nepo. O itse tebello ke hore koetliso ena e ba tsoalle litholoana tse molemo, tse kholo sebakeng sa ho ntšoa bofuma ka metso metseng.

E mong oa ba nkileng

karolo koetlisong ena, Lehla Motšeeo, o supile a rata temo kaha a hotse ka eona, ka hona malebela a tlo a fuoa koetlisong ena a tl'ona thusa hore a il'ona thusa sechaba se ratang temo ho ba le temo e ntlafetseng kaha kelello ea hae e tla be e chorile.

O re o ithutile hore batho ba bang ba ntse ba e-na le lisebelisoa malapeng, ba bang ke ba nang le litsebo ha ba bang e le ba tl'ona qala ho fumantšoa thuso empa o lumela hore ka koetliso ena o tla tseba ho arabela tlhoko ea sechaba.

O tsoetsepele hore Tšakholo Mafeteng, boholo ba masimo a teng a letse, ba lemmeng lekhaha le letle empa e le hore ba angoa haholo ke phetoho ea boemo ba leholimo moo poone omellang ke letsatsi le chesang haholo, le lipula tse matla tse amang chai.

Seeng Tlali, o hlalositse hore morero o moholo ke ho theola sekahla sa tlala le tlhokahalo ea mesebetsi metseng. A re ba tla una molemo ke basali, bacha le batho ba nang le bokooa mekhahlelong ea likhoebo ka ho fapakana, ba rupeoang tebello ke hore ba tla tataisa batho ba tl'ona una molemo ho fihlela qetellong ho bona hore ba ba sia likhoebo tsa bona li atlehile.

Mekhatlo e itela ho 'muso

Nthabeleng Seitlheko

Mamoletsi Moletsi eo e saleng a sebelisa litlhare tsa bophelo bohle tse thusang sesole sa 'mele ho loantša kokoa-na-hloko ea HIV ho tloha ka selemo sa 2009, o lebohile Lekala la Bophelo le Mekhatlo e ikemetseng ka ho boloka bophelo ba sechaba ho bona hore litlhare li fumaneha ha bonolo. O boletse tsena puisanong le Koranta ka la 18 Hlakola monongoaha.

O re o sebelisitse litlhare ho sa le thata hore batho ba li fumantšoe li le theko e boima, 'me ka nako eo le litšebeliso li ne li fanoa ka thata ho e-na le khethollo ho ba nang le lefu lena. O re ka lebaka la mekhatlo e mengata e ikemetseng e ileng ea e-ba lentsoe la sechaba kajeno o na le lilemo tse 23 a sebelisa litlhare tsa bophelo bohle 'me o ntse a phela.

Moletsi o supile hore o ile a theha mokhatlo oa Basali ba nang le tšoaetso kam-



or'a ho hlokomela boemo ba tahlehelo ea bophelo ba basali ba hlokalang ba sia bana e le likhutsana hobane ba tšaba ho sebelisa litlhare. A re ba ile ba potoloha le metse ho fana ka thuto le ho tlosa sekho-bo sa litlhare tsa bophelo bohle hore basali ba li noe ka sebete.

H'a tsoelapele o re mokhatlo oa habo, o ntl-

fatsa basali ka malebela a boipheliso le mekhoea ea boitlhokomelo. A re ho ikhula ha lithuso tsa Naha ea Amerika ho ile ha bakela sechaba se sengata letsoalo hoo batho ba neng ba mathela litsing ho kopa litlhare.

Leha ho le joalo ba leboha 'Muso oa Lesotho ka ho fana ka tšepo ho sechaba ka hore litlhare li tla ba teng,

kaha o li lefella. Seo a se kopang ke hore 'muso o fane ka ts'ehetso ho bahlaboli ba neng ba hiriloa ke Mekhatlo e Ikemetseng le baki hore bao ba tsoelepele ho etsa mosebetsi kaha tšoaetso e sa ema nqa e le 'ngoe.

O phethetse ka ho ipiletsa ho Basotho ho hlahlobela lefu lena molemong oa bophelo bo bottle ba bona.

Ho sa le joalo, Mekhatlo e Ikemetseng e bile le 'moka oa bo-ralitaba ho totobatsa kameho ea bona mabapi le qeto ea 'Muso oa Amerika ea ho hula lithuso nakong ea matsatsi a 90.

Boshepha Ranthithi ha bala polelo lebitsong la mekhatlo, o itse bona ke lentsoe la sechaba, ba isa thuto sechabeng ho bona hore kanetso ea litšebeliso tsa bophelo e ba hohle. A re mekhahlelo e mengata ea sechaba e angoe ke ts'oaetso ea HIV, ka hoo ba kopa 'Muso oa Lesotho ho fana ka tšehetso hore mosebetsi oo ba neng ba o etsa sechabeng o 'ne o tsoelepele.

A re ba rata hore ba fuoe meaho eo ba sa e lefella, e le hore chelete e il'o sebelisoa litlhokong tse ling tsa bohlokoa e le karolo ea ho tsoellisa ho fana ka thuto sechabeng. O re 'muso o bone hore o tsamaea ka leano la tšireletso ea Litokelo tsa Mantlha tsa Botho tsa bophelo bo bottle, haholo bakeng sa bahloki, bacha le basali ba bacha lilemong le sechaba ka kakaretso.

Ha Mamello Makoe a kopile hore 'muso o kene lipuisanong le 'Muso oa Amerika, ka litaba tsa ho boloka tšehetso ea bona holima litaba tsa Lefu la Lefuba le tšoaetso ea HIV/AIDS, hore morero o joalo o tsoelepele kahar'a sechaba e le karolo ea ho hlola litlamorao tse ka bakoang ke mafu ana.

Ba ipiletsa ho 'muso ho ba le leano le kenyeletsang likhoebo tse ikemetseng hore li kenye letsoho litabeng tsena, molemong oa ho boloka bophelo ba Basotho. A re e bang ho ka etsahala Naha ea Amerika e hule lithuso tsa eona ka ho sa feleng, re tl'o ba le mathata ao Naha ea Lesotho e lokelang ho ithophela ona esale ha joale.

A supa ha ba e-na le leano la boitlhopho ba ho bona hore ba boloka bophelo ka hore naha e kenyeletse likhakanyong tsa lichelete boitlamo ba ho lefella litšebeliso tsa HIV/AIDS e le moralo oa boitjaro empa e le hore qeto ena e fihlile ea kenella litaba tsa bona ka lehare, kaha ba se ba le leetong la ho ithophela ho itjara hobane ba hlokometse ho qepha ha bafani.

Ha b'a khotsofalla litsiane

Nthabeleng Seitlheko

Muso oa Lesotho o bonahala o sa ikemisetse ho phethahatsa boitlamo ba ona, ba ho hlokomela batho ba nang le bokooa ka ho ba fa litsiane ho ipapisitsoe le boemo ba moruo le bophelo. Litaba tsena li hlalositsoe ke e mong oa batho ba nang le bokooa Molise Foso, ka la 20 Hlakola monongoaha.

Foso o re nyollo ea M50.00 ha e tl'o tliša phetoho ea letho hobane bophelo ba hona joale bo turu le moruo o fetohile. O re bao ba ne ba fumana M600.00 ka hoo hona ke ho ba roka mahlo a nyoeka hore e tle e ke ho na le ntho eo ba ntse ba e etsa.

O re 'muso o tlamehile ho hlokomela ba nang le bokooa ho latela boitlamo ba ona. O re ho latela mae-mo a bophelo ha joale tselo ea hae e ne e le hore chelete eo e nyolohile bon-yane bao ba fumantšoe M1,000.00 khoeli le khoeli.

O ipilelitse ho lekala ho

hlahloba taba ena hantle hobane ho na le batho ba bang ba phelang ka chelete ena, ho se moo ba nkang teng.

Letona la Tekano, Bacha le Ntšetsopele ea Sechaba Mohlomphehi Pitso Lesaona, o bontšitse hore chelete eo ba e abetsoeng e'a fokola ho latela mesebetsi e etsoang ke lekala la habo. A

re batho ba nang le bokooa ba amohela ka moo lekala le entseng ka teng hobane ba hlokomela bana ba likhutsana le batho ba tlokotsing.

O re e ne e le takatso ea hae ho bona ba nyolletsoe litsiane ka chelete e ngata empa sejo se nyane ha se fete molomo kaha e tla nyoloha selemo le selemo ha maemo a lumela. O itse ho

fihleng ha hae lekaleng leo bao ba ile ba nyolleloa litsiane ho tloha ho M400.00 ho ea ho M600.00 e ekelitsoeng ka M50.00 selemong sena sa lichelete.


Chelete ena, e nyolletsoe bahloki le batho ba nang le bokooa, bao bona ba fumang litsiane tsa bona nakong ea likhoeli tse tharo e se e bokellane.





MOB KIDDS EDUTAINMENT

Puzzle MOB 93-4574



Across

- 6 E mong oa Marena a Sehlooho (6,6)
- 10 Morena oa Sehlooho oa Tebang (8,6)
- 12 Ketso ea ho seha mpa ka lehare. (9)
- 13 Nku e faotsoeng (7)
- 15 Lentsoe le bolelang ho hlapa matsoho (7)
- 16 Nyenyefatso ea serope. (10)
- 18 Senqanqana se oela sehlopheng sefe sa mareho? (6)
- 19 Lentsoe le nang le ptj (7)
- 20 Lebitso la nonyana le qalang ka Mo... (7)

Down


- 1 Linonyana tse lupang pula. (8)
- 2 Mofuta o mong oa lingaka tsa Sesotho (12)
- 3 Bots'ehali ba Pule. (6)
- 4 Bohobe ba mabele a tala. (9)
- 5 Khomo e felehetsang mofu. (2)
- 7 Ho apeha lijo (9)
- 8 Lentsoe le nang le bj (11)
- 9 Nama ea poho e shoeleng e loana (6)
- 11 Nku e tona e sa faoloang. (6)
- 14 Mofuta oa senqanqana (10)

17 Nyalasi (4)

19 Ngoale e hlaha sehlopheng sa..... ho lihlopha tsa mareho. (4)

SOLUTION

MOB 93-4572





TSA KEREKE

Sr. Petrini ke President e ncha

Staff

E mong oa Baitlami ba Barali ba Kopano ea Franciscan, Sr. Raffaella Petrini FSE (52), bao morero oa bona e leng ho tsosolosa moelelo oa tse Halalelang, haholo-holo khalalelo ea bophelo ba motho, o entseng nalane ka ho thongoa ke Mopapa Francis ho ba

Batho ho tloha ka 2005 ho isa ho 2021.

Ka lebaka la litsebo le mahlale a hae, o tlioa boiphihlelo bo boholo ba bohlokoa litabeng tsa thuto le tsamaiso mosebetsing oa hae o mocha. O ne a hlahe ka la 15 Pherekhong 1969, motseng oa Rome, Italy. O na le lengolo le phahameng la Thuto ea Mahlale a Lipolotiki ho tsoa Junifisithing ea Libera International degli

ea St. Thomas Aquinas, moo hajoale a sebetsang e le Proffesor.

Ke mosali oa bobeli ea khetheloang litulo tse holimo kahar'a Vatican City, kamora hore Rabalumeli a khethe Sr. Simona Brambilla e le mookameli oa Discastery for Institutes of Consecrated Life and Societies of Apostles Life, e le khatelo-pele e bontšang hore basali ba ka khethe-



President ea pele ea moitlami oa mosali ea ho ba 'Musisi oa Vatican City State, phatlalatsong e entsoeng Vatican City, Rome ka la 15 Hlakola 2025. Sr. Petrini o tliil'o qala mosebetsi oa hae o mocha ka la 1 Tihakubele monongoaha.

Hara e meng ea mesebetsi ea hae e mengata eo a tlang ho ikarabella ho eona, e kenyeletsa ho ba mookameli e moholo oa mesebetsi ea tsamaiso, mosebetsi oa tšireletso oa naha, tlaleho ea maemo a moruo le bophelo bo botle a ntse a sebetsa 'moho le mobishopo.

Sr. Petrini o tlalehoa ke Lekhotla la Lipatlalatsa la CNA hore ke eena moitlami oa bobeli ea hlahlamang Khosana ea Kereke Fernando Vergez, ho khetheloa setulo sena. O tlalehoa a sebelitse e le Mongoli-Kakaretso oa 'Musisi ho tloha ka khoeli ea Pulungoana 2021. A boela a sebetsa Phuthehong ea Evangeli ea

Studi Guido Carli le Lengolo la Bongaka ho hlaha Junifisithing ea Pontifical

loa maemo a phahameng a boetapele ba Vatican City.

-CNA-

THAPELO EA JUBILEE



Ntate ea Maholimong

Ak'u etse rea u rapela hore tumelo eo u re fileng eona Ka Mor'a hau ebile e le ngoan'abo rona Jesu Kriste, 'moho le mollo oa lerato ka lipelong tsa rona Mollo o tlišoang ke khantšetso ea Moea o Halalelang li ke li tsosolose tšepo e lehlohonolo ea ho tla ha 'Musu ua hau. Mohau ua hau o ke o re fetole basebetsi ba mafolofolo tšimong ea hau, Basebetsi ba jalang peo ea molaetsa o molemo oa Evangeli.

E le hore peo eona eo, e hole ka botebo kahar'a batho bohle le kahar'a tlhohleho eohle, e fihlise ka ho phethahala tebello ea ho tla ha Lehlimo le lecha.

Le Lefatše le lecha.

Moo kamor'a hore matla oohle a bobele a felisoa, tlotla ea hau e tlang ho bonahatsoa e khanya kabosafeleng.

Ka mohau ua hau grasía ea Jubilee ena e ke e tsosolose kahar'a rona takatso Ea ho nka leeto la tšepo le taba-tabelo ea ho fihlela Letlotlo la Lehlimo.

Hape mohau ona oo, o ke o atise o be o ngatafatse thabo le khotso tsa Mopholosi oa rona lefatšeng lohle.

Joale letlotlo le thoriso li ke li isoe ho uena Morena Molimo oa rona Ea Halalelang 'me ea Tlotlehlang kamehla le mehla.

Amen.

2024-2025 SELEMO C

SONTAHA SA 7 HAR'A SELEMO

Samuel 26,2.7-9.12-13.22-23

Pesalema 102

1 Ba-Korinthe 15:45-49

Luka 6:27-38



Khothatso

Se ka ahlola, ha u na ahloloa

Ka Adama 'mele ea lona e jele lefu la nama le moea lefa, joaloka motho oa pele a tsoa leroleng le lona le tsoa leroleng. Empa ka Mali a Bohlokoa a Kriste, nakong ea Sakramente ea Tlhatsuo le amohetse Moea o Halalelang le moea o mocha (Ezekiele 11:19-20; Jeremia 31:31, Ba-Galata 6:15, 2 Ba-Korinthe 5:17) oa tholoana ea Morena (1 Joannes 3:9) e le tlhomamiso ea pele (2 Ba-Korinthe 1:22) ho ba le kabelo pholohong ea 'Musu oa Morena. Ka motho oa Bobeli ea tsoang leholimong, Moea o fanang ka bophelo (1 Ba-Korinthe 15:45) le na le setšoantšo sa ea leng Lehlimong.

Ka bophelo ba lona ba letsatsi le letsatsi ba Sekriste Kriste o le biletsa ho amohela le ho sireletsa moea o mocha oo le o amohetseng joaloka libopuo tse ncha. Le bilelitsoe ho mamela joaloka bana ba Molimo ea Halalelang, hobane ka tlhatsuo ea lona le ne le tlosoa ho ba ba lefatše joalokaha Kriste e se oa lona. (Joannes 17:16)

Thutong ea Pele le bona mohlala o motle oa ho sheba lintho tsa lefatše le moea o mocha o tsoang ho Kriste. Nakong eo Abishai a bonang monyetla o motle o hlaha oa ho bolaea Saule, o re ho Davida a mo hlabe hang. Empa Davida a mo fetola a re na ke mang ea ka phahamisang letsoho la hae ho Mokhethuoa oa Morena na? Mantsoe ana a le hopotsa a Kriste, h'a ne a re na u ka boelloa ke'ng ha u rata ba u ratang hobane baetsalibe le bona ba etsa joalo. Empa rata le lira tsa hau hobane moputso oa hau o tla ba moholo Lehlimong.

Davida o ne a sa batle ho jara sekhobo sa ho ba eena ea bolaileng Saule ea khethiloeng ke Morena. Ke 'nete monyetla o no hlahile etsoe Saule o sotla Davida, a bile a le mona empa tsena tsohle e ne e se lebaka le lekaneng la hore a inkele molao matsohong. Hoja o 'molaile o ne a tla araba kapel'a Morena joalokaha Saule a tla arabella liketso tsa hae. Davida o tšoaretse Saule ho tsohle tseo a mo entseng tsona, Morena Molimo o tšoaretse Davida melato eohle ea hae. Hobane tekanyo leo le lekanyang ka eona ke eo le tla ahloloa ka eona. (Luka 6:38)

Bana b'eso ha ho motho ea shebanang le tsa moea le nama ka nako e le 'ngoe, ha ho khonahale! Ea etsang tse lokileng o tsamaea tumelong ea hae e phelang ho Kriste, empa nakong eo a behang litakatso tsa nama pele, o sa fetohetse tumelo ea hae.

Kaofela ha rona ha re shebeng tlaase lipelong tsa rona ho bona hore na menahano le maleme a rona a khanya linthong tse Halalelang, tseo re ka ikotlang sefuba ka tsona hore re bana ba Molimo. Re na le menahano le maleme a moea kapa tsohle ke tsa lefatše? Tlhoko na e teng ea ho itlhoekisa ka grasía ea Morena ka tšokoloho ea 'nete Sakramenteng ea Pako? Ka maikutlo ona ao, ha re ikilitaetseng ho ba lipaki tsa mantsoe ana, "Se ka ahlola 'me u ke ke ua ahloloa."

Bahalaleli har'a Beke

- | | |
|--------------|---------|
| 24 Hlakola | Adela |
| 25 Hlakola | Donatus |
| 26 Hlakola | Victor |
| 27 Hlakola | Bernard |
| 28 Hlakola | Oswald |
| 1 Tihakubele | Monan |

K4L e theha selekane

Tšeliso Thakholi

Botsamaisi ba Sehlopha sa Bolo ea Maoto sa Kick4Life, bo thehile selekane se secha sa setsoalle le tšebeliso-mmoho lipakeng tsa sehlopha sa Kick4Life le sa Wrexham AFC ea Naha ea Wales, tlasa tšehetso e matla ea Letlole

bo tebileng le ho ikamahanya le maemo a kajeno a bophelo ka tšebeliso ea bolo ea maoto.

H'a bua le baphatlalatsi ba litaba tsa lipapali 'mokeneng ona, Motsamaisi e Moholo oa Letlole la GA, Monghali Fatima El Mahdi o boletse hore bolo ea maoto ke sebetsa se matla se kopanyang sechaba le ho theha menyetla e mengata ea ho tlisa liphe-

cha ka litsebo tseo ba li hlokanang ho ithehela bokamoso bo phethahetseng.

Hlooho ea Tsamaiso ea Sechaba Sehlopheng sa Wrexham AFC, Jamie Edwards o itse tšebeliso-mmoho ea lihlopha tse tse peli ke senotlolo sa bohlokoa sa kajeno le kamoso se tlang ho bulela bacha ba linaha tse tse peli mamati a bophelo. "Ha GA eona e tla matla-



la Generation Amazing Foundation(GA), 'mokeneng oa baphatlalatsi ba litaba tsa lipapali o bileng Ntlo-Kholo ea Kick4Life, Maseru ka la 19 Hlakola 2025.

Tšebeliso-mmoho ena ea lihlopha tse peli eo morero oa eona e leng ho tlisa liphetoho bophelong ba sechaba sa habo tsona e qalileng ngoahola, e thehiloe ka morero oa ho fetisa hara tse ling phapanyetsano ea litsebo tsa ho holisa bolo ea maoto le ho ntlafatsa mekhatlo e tsamaisang lihlopha tse na Tikolohong e ka Boroa le ka Leboea ka tšehetso ea lithuso tsa lichelete tsa Letlole la GA.

E le karolo ea tšebeliso-mmoho ena e ncha, GA e tla fana ka lithuso tsa lichelete le katoloso ea mahlale a tsamaiso ea bolo ea maoto, e le ho thusa ho ntšetsa-pele Lenane-Thuto le etselitsoeng ho hlomella bacha ka litsebo tsa bohlokoa tsa mekhoha ea boipheliso, ho hiroa, ho etsa liqeto tse nepahetseng molemong oa bophelo ba bona, ho ba le boinahano

toho bophelong ba bacha. A re ka setsoalle le tšebeliso-mmoho le sehlopha sa Kick4Life le Wrexham AFC, "re theha borokho lipakeng tsa Lesotho, Wales le Qatar re sebelisa lipapali le tšebeliso ea ho kenya thuto le tšusumetso ea lerato la lipapali sechabeng."

A tiisa hore ba ikemiselitse ho tšehetsa morero ona o motle o tlang ho matlafatsa ba-

fatsa le ho holisa bokamoso ba setsoalle le tšebeliso-mmoho ea rona ka ho fana ka tšehetso." Ke Jamie eo.

Motsamaisi oa Kick4Life, Motlatsi Nkhahle o lebohile le ho thohletsa tšebeliso-mmoho ena ea lihlopha tse peli kaha e tliilo tlisa liphetoho tse kholo ho bana ba Basotho, e seng feela bolong ea maoto empa le mafapheng a fapakaneng a bophelo.



Litlholisano tsa Litebele



Tšeliso Thakholi

Mokhatlo oa Lesotho o Tsamaisang Papali ea Litebele(LBA) ka kopanelo le Sehlopha sa Papali ea Litebele sa Tšosane tikolohong ea Maseru, se hlophisitse litlholisano tse kholo tsa National Boxing Tournament tse tlii'o tšoarelola holong ea Maria 'Mabaso, Ha Mabote ka la 1 Thakubele 2025.

Litlholisano tse tse pele tse bulang selemo papaling ea litebele, ke tse bulehileng tseo joalokaha LBA e ntse e potoloha le lihlopha tsa litebele litikolohong ka ho fapakaneng, e lumellang sehlopha ka seng ho tšoara litlholisano tsa mofuta ona ka morero oa hore kahar'a tikolohong kapa sebaka seo sehlopha se leng kahare ho sona, se ke se fumantšoe tlhabollo le sechaba se ke se tli'o bona bana ba sona ha ba tebuka kahar'a lesaka la litebele, ba nkhisetsana mahafi ho se ngoan'e motle.

Puisanong le Raliphatlalatso oa LBA, Monghali Letšasa Taole o boletse hore morero o moholo oa litlholisano tse tse pele ke ho pholecha libapali hore li boele li khutlele temeng li boetse li le matla kamor'a nako e telele haholo. O re e meng ea meralo ea bona e le batsamaisi ke ho sebeletsa hore lipapali tsa litebele li bapaloae nako eohle, "ho se ke ha e-ba le khfutso ea

nako e telele lipakeng." Ho feta mona a supa hore hona joale ba se ba ntse ba ba lokisetsa ho tla bopa mokhethoa oa naha kaha ba se ba ntse ba e-na le bakoetlisi ba seng ba ntse ba qaleletse ho tla hloaea libapali tse ipabolang ka mekhahlelo le boima ba tsona.

A re ba boetse ba se ba ntse ba lokisetsa hore ba lule ba le malala-a-laotsoe e le hore ha ho ka hlaha litlholisano tsa machaba, ka tšohanyetso ba tle ba tsebe ho isa ntoa bathong. A re litlholisano tse tse pele ke lihlopha tsa koana hae, ho hlaha literekeng tse leshome tsa naha, haele ba machaba ha b'a lumelloa kaha lipapali tse tse ehlile li lokiselitsoe ho matlafatsa libapali tsa lehae feela.

A tsoelapele ka hore ba lebelletse ka thahasello e kholo barati le batšehetsi ba papali ea litebele esita le sechaba sohle sa Basotho ho tla atlehisa lipapali tse tse pele ka ho tla inoesa ka nkho ba se 'na ba romeletsa, etsoe pela e ne e hloke mohatla ke ho romeletsa. A phethela ka hore kholo e teng e kholo kahare ho papali ea litebele, 'me morero ke ho tla etela motse le motsana ho tsebahatsa papali ena. E le ho fihlela sena a ipiletsa ho bafani ho etsa letsoho la monna, e le ho atlehisa meralo ea bona kaha e meng ea eona e sitoa ho atleha ka lebaka la khaello ea lithuso tsa lichelete.

Li ipatla ho Premier League

Tšeliso Thakholi

Lihlopha tsa Bolo ea Maoto tsa mokhahlelo o ka tlaase oa A Division, Qoaling Highlanders le Maroala li nkile ka sekaja, ha li batle letho, li ipatla ho nyolohela boemong ba lihlopha tse kholo tsa Vodacom Premier

League ha selemo sena sa lipapali se fihla pheletsong ka Motšeanong monongoaha, 'me ka lehlakoreng le ka Leboea li momane habohloko! Ha ka Boroa teng Maroala e se e tsoile tjaro ea mabonoa.

Ka Leboea Qoaling Highlanders e ntse e se kot-sometse sa maratsoana ka lintlha-kholo tse 23, 'me e qotelitsoe habohloko ke

Members ka lintlha-kholo tse 22, Quthing LMPS ka lintlha-kholo tse 19, Liponono ka tse 18 le Swallows ka tse 17. Le tsona li ntse li e-na le monyetla o moholo oa ho iphumana se seng sa tsona se hapile Liki. Lihlopha tsena li siana feela ka ntlha e le 'ngoe sehlopha ka seng.

Athe ka Boroa teng, sehlopha sa Maroala se ile

sa hla sa roalla le sa sele, kaha se na le monyetla o moholo oa ho ikhapela Liki e ka Boroa ea A Division ho se sehlopha se tla qothisana lehlokoa le sona ho ea tsoa khoeleng kaha se na le lintlha-kholo tse 28. Ha boemong ba bobeli e le Litšilo ka tse 17, borarong ke sehlopha sa sepolesa se bitsoang Sehenehene ka 17, boneng ke Litšehlo ka tse

15. Ha ka Leboea lihlopha tse tsietsing e kholo ea ho tla rathoa ke selepe ke sehlopha se kileng sa bapala bolo e ntle haholo sa Naughty Boys se neng se qeta ho theohela ho A Division ngoahola. Sehlopha sena se boemong ba borobong ka lintlha-kholo tse robong, ha sa ho qetela e le Qacha's Nek LMPS ka lintlha-kholo tse robeli.

Athe ka Boroa sehlopha sa BB Warriors se maemong a borobeli ka lintlha-kholo tse robeli, ha Lilemela e le ka qetellong ea loko ka tse supileng. Lihlopha tsena tse 'ne ha li ke ke tsa phahamela mapoqo kaofela ha tsona li tl'o theohela mokhahlelong o ka tlaase oa B Division ha selemo sa lipapali se fihla pheletsong.

Puisanong le batšehetsi ba sehlopha sa Qoaling Highlanders ba re ba thabile haholo ha sehlopha sa bona se tliil'o boela se khutlela lihlopheng tse kholo hape kamora lilemo tse telele haholo se ne se tsoe lihlopheng tse kholo. Ba tiisa hore moo se leng teng se ke ke sa hlotse se theoha ho fihlela liki e fela. Ba entse tlhokomeli-so ho botsamaisi ba sehlopha hore bo etse meralo e hlakileng e tla tseba ho se thusa hore se tsebe ho lula Liking e Kholo bophelo bohle ba sona.



Likuena e ka se fihle

Tšeliso Thakholi

Sehlopha sa Naha sa Bolo ea Maoto, Likuena se ka se fihle litlholisanong tsa Mohope oa Lefatše joaloka linaha tse ling tsa Afrika tse Tikolohong e Leboea ka mabaka a 'maloa. Tsena li boletsoe ke ba bang ba bakoetlisi ba lihlopha tsa mokhahlelo o ka tlaase oa A Division kamora hore se qalelle ho itokisetse lipapali tsa sona tsa ho phunyeletsa ho ea Mohopeng oa Lefatše o tliil'o tšoareloa linaheng tsa Canada, Mexico le Amerika isao.

Likuena e nang le libeke tse peli e qalile boikoetliso ba eona, e Mokhahlelong oa C moo se pannoeng le linaha tse matla tse kang Rwanda, Afrika Boroa, Benin, Nigeria le Zimbabwe.

Ho ea ka bakoetlisi, Liki ea lehae eo Likuena le linaha tsa Tikoloho e ka Leboea ho Afrika li fumanang libapali ho tsona ha se tse mat-

la haholo, ho latela ka moo li thehiloeng le ho bapala ka teng. Ba re ho bohlokoa haholo hore libapali li se ke tsa bapala liki ea linaha tsa habo tsona feela, empa le kante ho naha moo ho bapaloang ka thata haholo. "Ho bapala linaheng tse ling ebile e le Liliki tse matla ho bebofatsa mosebetsi haholo kaha bahlankana hobane ba tloha moo ka litsebo tse ngata, 'me ha ba fihla linaheng tsa habo bona ho ba le phapano e kholo." Ba rialo.

Ba etsa mohlala ka Naha ea Lesotho eo libapali tsa eona li bapalang linaheng tse kang Afrika Boroa, Botswana le Eswatini moo Liliki tsa teng li batlang li ntlafetse haholo papisong le tsa haae koano. Ba re sena se tlišitse kholo le ntlafalo e kholo kahare ho sehlopha sa naha. "Naha ea Lesotho e se e tšajoa le ho hlompua haholo ke linaha tse ling, papisong le nakong e fetileng moo e neng e iphetotse ngoan'a motšeaare ea otloang ke bohle."

Ba re morao tjena Lesotho le bonahala le sebetsa hantle empa ha le e-s'o be le matla a lekaneng hore le ka kenela Litlholisanano tsa Mohope oa Lefatše. "Le sa haelloa ke ho lokisa lintho tse ngata haholo tse kenyeletsang mabala a boemong ba machaba."

Ha ba tsoela-pele ba supile hore ha libapali tsa Lil-

iki tsa linaha tsa Leboea ho kenyeletsa le Lesotho li sa koetla hantle ka lebaka la maemo a Liliki tsa tsona, li ke ke tsa o besa oa tuka. Ba re lipapali tsa Liki li lokela ho thusa sebapali hore se ntlafale 'meleng le kelelong hobane seo se chorisa boitšoarō le menahano ea sona. Ba bontša hore bolo ea matsatsi a morao tjena, e

fetohile haholo empa bohlo ba linaha tsa Tikoloho e ka Leboea ea Afrika li ntse li saletse morao ka ho bapala ka mokhoa oa khale.

Ba re lintho tse ling ke tseo Afrika e ka Leboea e hlokanang Afrika e ka Boroa ho e thusa ho tsona. Ba qetella ka hore leha Lesotho le ntse le atleha ho hlola linaha tsa Afrika e ka Boroa tse kang Ghana, Nigeria le tse ling ha ho na ho ba bonolo ho phunyeletsa ho ea fihla Mohopeng oa Lefatše.



We are wired to want perfection in whatever we do, this type of wiring has forced us into believing that mistakes aren't human, they make us less human and are degrading. We are forced to hide our mistakes in order to fit into the world of perfection that we are socialised into. We are at a point where who so ever make mistakes is labelled by those mistakes and that label sticks no matter how well the person can do after that all we can remember is their mistakes. Growth should teach us that mistakes are part of learning and are only an attempt to get things correct not a definition of a person behind those mistakes. We should treat mistakes differently, we should look at them as something that refines us, giving us the experience we never had and giving others an opportunity to learn from those who made mistakes. Hiding our mistakes should be seen as something that denies those around us a chance to see our fallibility and take a lesson. An approach should be such that mistakes don't define us but refine us.

Mistakes shouldn't define but refine us



Teboho Matjeka
63574502/58911803

ELEGANCE COUTURE

fabric that speaks

**REDEFINING ELEGANCE
WITH DESIGNS THAT
INSPIRE CONFIDENCE**



PHYSICAL ADDRESS:

TRADORETTE BUILDING ROOM B22

WHATSAPP: +266 58524642

FACEBOOK AS ELEGANCE COUTURE

INSTAGRAM AS ELEGANCE COUTURE



www.moeletsiabasotho.co.ls

Walk with style, wear your grace

